

Lajčák u Washingtonu: Sjedinjene Američke Države ostaju fokusirane na BiH



Visoki predstavnik i specijalni predstavnik EU, Miroslav Lajčák, jučer je u Washingtonu informirao podsekretara za politička pitanja State Departmenta Williama Burnsa o teškoj političkoj situaciji u BiH.

“Bilo je očekivano da će se nakon izbora zemlja u potpunosti fokusirati na obaveze neophodne za njen evropski put. To se nije dogodilo. Iako je bilo napretka u rješavanju većine prioriteta koje je odredilo Vijeće za implementaciju mira, malo je urađeno na pitanju državne imovine i definiranja statusa Brčkog. U svim glavnim gradovima zemalja članica Vijeća za implementaciju mira je istaknuta potreba da vlasti u BiH preduzmu hitne korake”, rekao je Lajčák.

Visoki predstavnik i specijalni predstavnik EU predočio je trenutnu političku situaciju u BiH i naveo pomake koje je ova zemlja načinila u pogledu ispunjavanja pet uslova i realizacije dva cilja koje je postavilo Vijeće za implementaciju mira u februaru.

Miroslav Lajčák i podsekretar Burns složili su se da Bosna i Hercegovina mora u potpunosti ispuniti uslove i ciljeve koje je postavilo Vijeće za implementaciju mira da bi moglo doći do tranzicije OHR-a na EUSR.

Podsekretar Burns je ponovo potvrdio da će Sjedinjene Američke

Države biti i dalje veoma fokusirane na Bosnu i Hercegovinu.

I visoki predstavnik i specijalni predstavnik EU i podsekretar Burns ponovili su da je reforma složene ustavne strukture BiH važna i da je to pitanje kojim se moraju baviti politički lideri u BiH.

Visoki predstavnik i specijalni predstavnik EU boravio je u posjeti Washingtonu gdje je održao seriju sastanaka na visokom nivou pred naredni sastanak Upravnog odbora Vijeća za implementaciju mira koji treba biti održan krajem novembra.

Visoki predstavnik i specijalni predstavnik EU također se sastao sa zamjenikom pomoćnika sekretara za jugoistočnu Evropu Stuartom Jonesom, ekspertima iz Vijeća za nacionalnu sigurnost i savjetnicima za vanjsku politiku predsjedničkih kandidata Baracka Obame i Johna McCaina.

Visoki predstavnik i specijalni predstavnik EU večeras stiže u Ankaru na posljednjoj etapi ovog kruga konsultacija.